

Gairm

nas fheàrr na còir na cloinn-nighinn, agus tha còir an duine as sine nas fheàrr na còir an duine as òige. Is e am mac as sine, mar sin, an t-oighre as fhaisge air athair. 'Na dhéidh-san thig am mac as òige; 'na dhéidh-san an nighean as sine; agus 'na déidh-se an nighean as òige. Ma chaochail am mac as sine roimh athair, a' fàgail teaghlach, gheibhear an t-oighre am measg an teaghlach—air thoiseach air a' mhac as òige agus air an dithis nighean. Air a' mhodh cheudna, thig teaghlach a' mhic as òige air thoiseach air an dithis nighean, agus teaghlach na h-inghne as sine air thoiseach air an nighinn as òige.

BRAITHREAN AGUS PEATHRAICHEAN:

Mur do rugadh duine cloinne riamh do'n chroiteir, no mur eil aon de àl beò, is e a bhràithrean 's a pheathraichean 's an àl as fhaisge air ann an sealladh an lagha. Tha còir nam firionnach a rithist nas fheàrr na còir nam boirionnach, agus ma tha teaghlach aig duine aca tha còir an teaghlach a réir còir an athar no na màthar. Ach am measg bràithrean a' chroiteir, chan eil e fìor a ràdh gun tig am fear as sine an còmhnaidh air thoiseach air an fhear as òige; ma tha àireamh bhràithrean ann—feadhainn nas sine na'n croitear agus feadhainn nas òige—is e a' cheud bhràthair as òige na e-fhéin an t-oighre as fhaisge air. 'Na dhéidh-san, thig an ath bhràthair as òige, agus mar sin air adhart gu ruigear am bràthair as òige air fad. Am measg nam bràithrean as sine na'n croitear, thig a' cheud bhràthair as sine na e-fhéin air thoiseach air an ath bhràthair as sine, agus mar sin air adhart gus an ruigear am bràthair as sine air fad. Am measg nam peathraichean, air an làimh eile, tha còir na té as sine an còmhnaidh nas fheàrr na còir na té as òige.

Mar eisimpleir air a so, canaibh gun d' fhàg croitear bràthair is piuthar nas sine na e-fhéin, agus bràthair is piuthar nas òige. Is e am bràthair as òige an t-oighre as fhaisge air. 'Na dhéidh-san thig am bràthair as sine; 'na dhéidh-san a' phiuthar as sine; agus 'na déidh-se a' phiuthar as òige. Ma tha teaghlach aca, thig teaghlach a' bhràthair as òige air thoiseach air a' bhràthair as sine agus an dithis pheathraichean; thig teaghlach a' bhràthair as sine air thoiseach air na peathraichean; agus thig teaghlach na peathar as sine air thoiseach air a' phiuthar as òige.

CUIDEACHD ATHAR.

Nuair nach eil duine ann de na càirdean a chaidh ainmeachadh, is e athair a' chroiteir an t-oighre as fhaisge air. As eugmhais athar, lorgar an t-oighre am measg bràithrean is peathraichean athar, agus an àl, le bhith a' leantainn mac samhail na riaghailtean a tha leagte a thaobh bràithrean is peathraichean a' chroiteir fhéin. Mar sin, tha bràthair as òige na athair a' tighinn air thoiseach air bràthair athar as sine. Chan urrainn màthair a' chroiteir, no duine sam bith a tha càirdeach dha a thaobh a mhàthar, a bhith gabhail sealbh air a' chroit mar oighre.

An déidh cuideachd athar, feumar a dhol a nis anns an dòigh cheudna a dh' ionnsaigh cuideachd seanair a' chroiteir (is e sin ri